



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir_yimym

tir yimym TAPAK 8

Totzü jenjang ajungketba atema Kenya nung longkak ait

Sinner-i Italian Open koka alizüing tasen ka tongtetogo



VOL. XXIII ISSUE NO. 215 (ADOK 215) DIMAPUR SANGTENNÜ (TUESDAY) MONUPII (MAY) 19, 2026 ₹ 5.00

Nagaland Governor-i School Education maparen asadang

Dimapur, May 18, 2026 (TYO): May 18, 2026 nü Naga Bhavan Conference Hall, Lok Bhavan nung School Education Department meyipa reprangshiba senden ka menogo.

Nagaland Governor Nand Kishore Yadav menden ser amenba senden nung tang Nagaland nung school education jenjang nung rangloker olemtep.

School Education Department ketdangsürtemi osang lemsatpedang sorkar aser nija school, tesayurtem aser kaketshirtem indang metetdaksü.

Senden nungsa Education Management Information

System (EMIS) ajanga data-driven governance maparen inyakba meyipa reprangshi.

Department of School Education ajanga sorkar school tem nung free textbooks aser learning materials agütsüba, elementary education programmes kübok uniforms & notebooks agütsüba aser PM POSHAN scheme kübok student nutrition aser school attendance maparen inyakba osang lemsatped.

Senden nungsa World Bank ajanga teyari agüja Nagaland Education Project - The Lighthouse (NECTAR) kübok mapa inyakba aruba asadanga liasü.

Mkg-i CMC Vellore doctor tem arutsü

Dimapur, May 18, 2026 (TYO): CMC Vellore nungi Super Specialists telok ka Dr. Imkongliba Memorial District Hospital, Mokochung-i arutsü lir ta Dy. Chief Medical Officer Dr. Takosunep-i metetdaksüogo.

May 29 aser 30, 2026 anogotem IMDH nung CMC Vellore nungi Urologist, Cardiologist aser Endocrinologist den free consultation sütettsü.

Ajisüaka temang reprangba aser mozütembo shirangertemi menoktsü ta Dy. CMO, IMDH-i sangdong ka nung ashi.

Iba asoshi May 19, 2026 nungi OPD timings nung MOPD aser Surgical OPD IMDH nung registration aser screening asütsü. Mapang kanga petdaka asünung mezüing arurtem nung ajemdaker shirangertem shimtsü ta paisa metetdaksüogo.

DoNER Minister Scindia aser CM Rio nati coffee mapatong tenzüktsü



Dimapur, May 18, 2026 (TYO): May 18, 2026 nü Sanchar Bhawan, New Delhi nung Union Minister of Development of North Eastern Region (DoNER) Jyotiraditya Scindia aser Nagaland Chief Minister Dr. Neiphiu Rio nati 'Cluster-based Coffee Value Chain Development in Nagaland' mapatong tenzükogo.

Iba sentong nung Minister of State, DoNER, Sukanta Majumdar, Deputy CM for Planning & Transformation, National Highways, Nagaland T. R. Zeliang, Department of Land Resources, Nagaland Advisor G Ikuto Zhimomi, sorkar ketdangsürtem, Coffee Board of India nungi teshimtet nübotem, aluyimertem aser entrepreneurs aden.

"DoNER Minister-i Nagaland nung coffee renlokdaksütsü

mapa nung kanga dang mulungsoa yariba atema pelar. DoNER aser NEC ajanga iba mapatong asoshi Department of Land Resources, Nagaland nem Rs. 44.06 crore agütsür" ta CM Dr. Rio-i ashi.

"Nagaland nung coffee ya alternative crop ka dang masü saka tajangzük anguba tsünüsenbongtsü ka kümogo. 2021-22 nung 21 MT dang tsünütet saka 2024-25 nungbo 73 MT jungnüa tsünütetogo aser Viksit Nagaland kübok 2047 tashi nung 50,000 hectares nung tsünütsü alizüing lir" ta pai ashi.

"Kohima district kübok Tuophema aser Niuland district kübok Ghotovi nung pilot clusters ana shimtetogo aser maneni tanga district tem nunga inyaktsü. Iba pilot project nung hi-tech

nurseries lapoktsü, washing stations aser roasteries dena modern post-harvest infrastructure yanglutsü aser 'Coffees of Nagaland' amnoktsü atema marketing campaign tenzüktsü" ta CM Rio-isa metetdaksü.

CM Dr. Rio-isa sendaktepa alirtem dang iba mapatong inyaka aotsü asoshi administrative aser political support agütsütsü nangzük.

"Department of Land Resources dang senpak shia timi amshitsü aser beneficiary shia nem tashi agütsütsü tetuyuba agütsüogo. Coffee tsünürtemi technologies tasen amshitsü, training programmes nung shilem agütsü aser Nagaland coffee indang brand ambassadors akümtsü ayongzük" ta paisa ashi.

CS Sentianger-i Dimapur nung tzümetsüing agi kongshiba tesemtem semdang

Dimapur, May 18, 2026 (TYO): Nagaland Chief Secretary, Sentianger Imchen, IAS-i May 18, 2026 nü Dimapur nung tzümetsüing agi kongshiba tesemtem semdanga senzüogo.

Taküm tzüingluruwa matongdang Dimapur aser East Dimapur nung tzümetsüing tensa asadangsü atema pai tesem balala sema senzü.

Chief Secretary Sentianger den külemi district administration aser line department ketdangsürtemi Nagarjan Police Point; Vilhume/S.M. Colony; East Block Burma Camp (Narkul Turning); DMC dumping area, Sunrise colony aser New Field Check Gate semdanga liasü.

Iba mapang ketdangsürtemi Sentianger dang tzümetsüing adokba timtem lemsatped. Drainage systems tangbangba, drainage channels nung ali atsünga agiba aser kiyong aika nung drainage infrastructure peria maliba ajanga iba timtem ajurur ta parnokii ashi.

Tesem balala sema senzüba sülen Sentianger-i senden ka amendang Dimapur nung solid waste management tajungba akümtsü, inter-departmental coordination akangshitsü, aser sensotem tangatetba melenshitsü indang ashi.

Plastic waste aser jana mashii endokba ajanga drains tangbanger anungji nala temalen



strainers ayutsüla aser item ajanga drainage channels nung plastic aser tanga janatemi tangbangba azüoktsü. Senotsü anguba dak ajemdaker check dams aser tanga drainage infrastructure yanglutsüla ta Sentianger-i ashi.

Paisa Nagaland State Disaster Management Authority, district administration, police, Public Health Engineering (PHE) Department, aser municipal bodies amalitepa flooding aser sanitation tayongzükbatem asoshi inyaktsüla ta nenshia liasü.

"Tang amshiba dumping site ya joko süngadokogo aser iba ya waste segregation practices maliba ajanga lir. Anungji kilen shia nung jana biodegradable aser non-biodegradable categories nung bendangtsüla aser iba asoshi sorkari tekaratiba nung

tetuyubatem agütsütsü" ta Chief Secretary-isa ashi.

"Municipal bodies-i solid waste management indang tebilemstü khuret abentsü aser municipal councils, civil society organizations aser Naga Council züingsemtem külemi sanitation anepalutsüla, ali atsünga agirtem meindoktsüla aser waste disposal practices tajung inyaktsüla" ta paisa metetdaksü.

Dimapur nung municipal services maparen nung temlung masür. Mapa inyaker nübo peria liaka garbage collection vehicles tamajung amshiba ajanga waste management operations nung tetsükdaksü ajurur. Anungji ketdangsürtemi garitem repair & maintenance asütsü atema tetuyuba agütsür ta Sentianger-isa metetdaksü.

Public-ia iba mapa nung shilem agütsüla aser merükmejuba, jana bendangba aser sanitation fees maparen inyaktsüla. Municipal services tajung agütsüra sensotemi sanitation charges agütsütsü mulunga dang lir ta paisa shisem.

Chief Secretary Sentianger-isa Information, Education, and Communication (IEC) activities tuluba inyaktsü aser public tangatetba aser inyakyim melenshitsü atema tayongzükba agütsü.

Dimapur DC, Dr. Tinojongshi Chang, NCS-ia Chief Secretary den district-level preparedness aser mitigation action plan lemsatped.

"Joint field inspections ajanga tzümetsüing ajurudak aser major drainage choke points ajitetogo

aser iba asoshi May 16 nungi Dimapur District Drainage Clearance Committee (DDDCC) kübok mapa tenzükogo. DDMA Dimapur nem senotsü agütsüba amshia iba mapa inyaker" ta Dr. Tinojongshi-i ashi.

Ajungben tzümetsüing timtem ajurura mock drill exercise aser Operation Night Guard nung amshiba Incident Response System (IRS) command structure mapa tenzüktsü ta paisa ashi.

Iba asoshi Health Department, PHED, Food & Civil Supplies, Power Department, SDRF, Fire & Emergency Services aser Dimapur Municipal Council (DMC) teti renema alitsü metetdaksüogo.

Maneni, tzümetsüing dak sendakba lendong asoshi DDMA kübok Emergency Response Fund (ERF) renema lir ta Dimapur DC-isa ashi.

Iba senden nung Commissioner of Police, district administration, Dimapur Municipal Council, Water Resources Department, Urban Development Department, Public Health Engineering Department (PHED), Nagaland Pollution Control Board, East Dimapur Town Council, District Public Relations Office (DPRO) aser disaster management and civic administration den sendaktepa aliba ketdangsürtem aden.

Tourism Department-i Angh den tarutsü sentongtem lemstep



Nagaland Angh Nand Kishore Yadav den Department of Tourism nungi ketdangsürtem külemi tangokba noksa ka yangi angur.

Dimapur, Monupii/May 18 (TYO): Department of Tourism, Government of Nagaland ajanga May 18, 2026 nü Naga Bhavan Conference Hall, Lok Bhavan, Kohima nung Nagaland Angh den department inyakyim, tayongzükbatem aser tarutsü nung inyaksü aliba sentongtem lemsatepa liasü.

Iba senden nung Secretary, Tourism, Nchumbemo Lotha-i Angh dang state nung tourism terenlok aliba indang rateta ashi aser eco-tourism, cultural tourism aser community-based tourism atema ajaki jangraba tesem ka ama Nagaland kumdaktsütsü nükjidong nung maparen balala inyakba indang lemsatepa liasü.

State indang sobaliba wazüka yua kasa mapang natural environment kumzüka ayutsüsa sustainable tourism ajungkettsü mangdang lemsatepa liasü. Nagaland dang "Land of Festivals" ta ajar,

anungji tribal tradition nungi tenzüka alima tebour ajungba aser biodiversity tsütsü tourism nung tjangshiba balaka agütsür.

Ketdangsürtemi Dzukou Valley, Khonoma Green Village, Mount Saramati aser Diezephe Craft Village densema alima repranga jajar tem atsür aruba tesem balala indang lemsatepa liasü.

Iba senden nung Khonoma aser Dzuleke ama yimtsüngtem nung nüburtemi anir tourism apa inyakba indanga lemsatepa liasü.

Nagaland nung küm shia domestic tourists 2.25 lakh aser international tourists 2,000 nungi 5,000 tsüngta arur ta department ketdangsürtemi Angh dang ashi.

Parnoki State Plan, DoNER/NEC schemes aser Ministry of Tourism indang Swadesh Darshan inyakyim kübok ki o jen terenlok mapa inyakba tongtipang kar lemsatepa liasü. Item rongnung Kisama

Heritage Village nung tourism facilities tajungba kuma yangluba, touris amenity centres, eco-tourism projects aser tourism infrastructures amala district balala nung yangluba indang dena lir.

Iba den ano iconic tourist centres, district balala nung homestay programmes aser Kisama Heritage Village aser Dzukou Valley tsüngta ropeway tesendaktep yanglutsüba aser Doyang Reservoir ama tarutsü nung inyaksü aliba projects tulutema indanga jembia.

State nung tourism teimla tulu liaka ki o jen agi meperiba ama aser tesendaktep tajungba akumtsü nungdakba, marketing aser digital promotion tsütsü tetsükdaktsü balala ajuruba indanga lemsatepa liasü.

Angh-ia Department of Tourism ajanga meranga inyaba asoshi pelaba lemsatepa tajungshi o jembia liasü.

AI & Technology amshiba indang workshop agütsü

Dimapur, Monupii/May 18 (TYO): Tribal Research Institute (TRI) Nagaland ajanga Directorate of Tribal Affairs, Nagaland nung staff tem asoshi 'Use of Artificial Intelligence (AI) & Technology' indang workshop ka May 18, 2026 nü Conference Hall, Directorate of Tribal Affairs, Kohima nung ayongzüka liasü.

Iba workshop indang nükjidong ya office mapa inyakba mapang modern technological tools amshiba nung tali metetjemtsü aser Governance, Administration, Communication aser data management nung Artificial Intelligence shilem timba

akumba indang awareness agütsütsü atema liasü.

Shisalen sayur Seto Khate, Senior Technical expert den Bendang IT expert ajanga yaritepa iba workshop agia liasü.

Iba sentong nung shisalen sayuri office maparen, report züluba, shiti züluba, data analysis, presentation aser digital record ketdangsüba nung AI amshiba indang lemsatepa liasü.

Parnoki AI tim yimya nung amshitsü, cyber security aser data privacy indang nung temulung agüja shisa lemsatep.

Iba workshop nung department ketdangsür aser

staff 35 dena AI amshiba indang angazüka liasü.

Shilem agirtemia office mapa nung ochishia aser mapang shidak nung service agütsütsü atema technology amshitsü tejangraba lemsatepa liasü.

Iba sentong nung onir Tekhingri Sangtam, Project Assistant liasü aser K. Onglingaku Chang, Project officer, TRI Nagaland ajanga iba workshop ayongzükbata nükjidong lemsatepa liasü.

Sorkar mapa inyakerem tali asendenshitsü atema mapang shia iba ama sentong ayongzüknung junger ta tebilemba lemsatepa iba sentong tembang.

WENN-i Business Governance Workshop ayongzü



Dimapur, Monupii/May 18 (TYO): Women Entrepreneurs Network Nagaland (WENN) ajanga Small Industries Development Bank of India (SIDBI) den lunghemer May 8-16, 2026 anogotem Meluri, Tseminyu, Wokha aser Zunheboto district tem nung tetsür entrepreneurs asoshi Business Governance

Workshop ayongzüka liasü. Iba workshop ya Nagaland nung entrepreneurial capacity tashi itshitsü nükjidong nung district shia ayongzükbata nung shilem ka lir.

Iba mapang business inyakyim kuli bendena ayuba, trade licensing inyakyim, FSSAI certification, Udyam registration, financial literacy, skill development aser

entrepreneurs yaritsü atema sorkari scheme balala agütsüba indang lemsatepa liasü.

Ozüng agi melaba ama inyaksangshi tali tajungba jung jangjatsü aser shishilempaba tsütsü tetsür nem tashi agütsütsüsa item workshop ya yanglua liasü. Iba sentong nung tetsür temi tejangraba tulu nung shilem agia liasü.

EDTC-i nüburtem dang jana tapi agi meindoktsü metetdaktsür

Dimapur, Monupii/May 18 (TYO): East Dimapur Town Council ajanga nüburtem dang jana tabu balala ayong, kilentsü aoba lenmangtem aser ayongkum nung khenyongi meindoktsü metetdaktsüogo.

Yimya shidak mamshi tapi agi jana indokba, sewer outlets tem ayong aser kilentsü aoba lenmang nung indang-indanga mesüokba ajanga libajen menenba den temang asoshi timtem aliba jangjaogo. Anungji ayong mesüra kilentsü aoba tesemtem nung indang-indanga sewer line outlen inoka alir dang özüng agi melaba ama merenshitsu aser senchi achitsü, ta EDTC ajanga metetdaktsü.

Iba den ak metsür tem dang tzü tamajung meindokdang waste filtration aser sedimentation systems yanglua amshitsü metetdaktsür, ta ashi.

Kilentsü aoba lenmang nung filtration, treatment mesüra sedimentation shidak mesüi ak sü mesüoktsüba tatok magütsütsü.

Nüburtem, donak kibur, institution aser ajaki iba özüng sülen shidak anidaktsü metetdaktsür. Aibelener nem özüng agi melaba ama temerenshi agütsütsü. Ibai nüburtem kumzüka ayutsü, mürekmejua alitsü aser libajen wazüka ayutsü mechi inyaker, ta sangdong ajangasa ashi.

Wokha nung two-wheeler taxi permit atema tetendangba alitsü

Dimapur, Monupii/May 18 (TYO): Two-wheeler taxi permits atema application agüja alirtem riding test May 20, 2026 anepdang 10:00 ako nungi tenzüka District Transport Office, Wokha indang Office Compound nung agitsü, ta Regional Transport Authority Office, Wokha ajanga sangdong ka nung metetdaktsü.

Iba riding test ya Convenor ama Assistant Regional Transport Officer (E) lenisüba kübok agitsü, kong Enforcement Inspector aser Motor Vehicle Inspector ya züngsem ama alitsü.

Iba maparen ajunga tajungtiba nung inyaktetsü mechi EAC (Transport) nem

mapa nungloktsüogo.

Candidates nem test atema two-wheelers agütsütsü. Ajisüaka candidates temi pei meyong two-wheelers bener arutsü akok, saka engine displacements ya 125cc mesüra timba asütsüla.

Test mapang department-i agütsüba two-wheelers raksatsüra, candidate shibai raksa, pai menoktsü.

Test atema TA/DA magütsütsü aser test mapang yiruba, lendong ajuruba atea department khuret masütsü, ta sangdong ajangasa ashi.

Iba den candidates temi passport-size noksa ana, sorkari agütsüba ID proof bener arutsüla, ta ashi.

JKM-i Minister Temjen Imna Along nem tenüngsang agütsür



Dimapur, Monupii/May 18 (TYO): Government Primary School Longtho atema desk aser benches agütsüba atema Minister, Tourism & Higher Education, Temjen Imna Along dang pelar, ta Japukong Kaketshir Mungdang (JKM) sangdong ka ajanga ashi.

JKM 'Consultative Tour 2025' mapang iba school nung desk aser benches tasen nungdakba ajiteta Minister den iba tebilemstü lemsatepa liasü ta ashi.

Kaketshirtem ajungtsü mechi pai mapa tajung jenti inyakba atema pelar. Pa dak nübur tenzüksü tejangraba aliba aliba ajanga GPS Longtho nung aliba kaketshirtem kisüng masü saka Japukong nung nüburtem ajangzüker.

JKM-i tzükong nung tanga school tem nung timtem ajurubatem atema lenmang bushiteptsü temulungtetba nung lir. Item desk aser benches ya school nem JKM ketdangsürtem lia May 16, 2026 nü agüja liasü.

METONGSHITSÜR :

Tir Yimiyim. adok 213, May 17,2026 anogo mezüng tapak nung "Tongpang Ozükümi Samanir T. Sentichuba kaket sayatsü," ta adokba osang tesüsaba paragraph nung " November 25, 2025..." ta alibaji November 25, 2015 ta metongshia azüngtsü mepishir . Küm tai adoktsüba atema sasar.

- Yimozülur.

V.D. Satheesan-i Kerala Chief Minister tenangzükba agiogo



Thiruvananthapuram, May 18, 2026: Hombarne Kerala yimtiba, Thiruvananthapuram nung aliba Central Stadium nung Congress lenir V.D. Satheesan-i Kerala Chief Minister tenangzükba agiba sülen tangokba noksa nung angur. Kasa noksa nung Congress MP, Priyanka Gandhi Vadra, Lok Sabha nung Opposition lenir Rahul Gandhi aser Congress Tir, Mallikarjun Kharge nungera angur.

Thiruvananthapuram, Monupii / May 18 (Agencies):

Hombarne Kerala yimtiba, Thiruvananthapuram nung aliba Central Stadium nung Congress lenir V.D. Satheesan-i Kerala Chief Minister tenangzükba agia Congress-i aniba United Democratic Front (UDF) teloktep sorkar tentetogo. Anepdang 10:00 ako nungi tenzükba sentong nungji Lok Sabha nung opposition lenir Rahul Gandhi, Congress Tir Mallikarjun Kharge aser UDF pusemertem aika liasü. Satheesan den külemi UDF

Cabinet nung züngsem tasenpurtemi tenangzükba agi. Sorkar tasenba nung Congress nem ministerial menden 11 lemezüksü; Congress nungi minister temji Ramesh Chennithala, Sunny Joseph, K. Muraleedharan, A.P. Anil Kumar, P.C. Vishnunadh, T. Siddique, Bindu Krishna, K.A. Thulasi, Roji M. John, M. Liju aser O.J. Janeesh nunger lir. UDF teloktep nung dena aliba Indian Union Muslim League (IUML) nem minister menden 5 lemezüksü aser minister temji P.K.

Kunhalikutty, N. Shamsudeen, K.M. Shaji, P.K. Basheer aser V.E. Abdul Gafoor nunger lir. Tawa assembly election nung UDF-i takok anguba ajanga Pinarayi Vijayan-i aniba LDF teloktep kum 10 yimsüsüba sorkar atsüngdokogo. Menden 140 nungi UDF-i menden 102 nung takok ngua liasü. Hombarne yakta Satheesan-i airport-i oa Lok Sabha nung Opposition lenir Rahul Gandhi aser Congress MP Priyanka Gandhi Vadra na agizüka liasü.

Küm ter tsüngda sorkar school lakh 1 shibangogo: NITI Aayog

New Delhi, May 18 (Agencies): 2014 kum nungi 2024 kum tsüngda India nung sorkar school lakh 1 shibangogo aser kasa mapang nungjisa kaketshir crore 2.26 ajema akum, ta NITI Aayog report ajanga metetdaksü.

'School Education System in India: Temporal Analysis and Policy Roadmap for Quality Enhancement' ta ajaba report ya taoba hopta sangdonga liasü.

2014-15 kum school tem nung tanur crore 26.95 liasü saka 2024-25 kum tashi nungbo kaketshir crore 24.69 dang akum, ta report nung shia lir.

2014 kum nungi 2024 kum tsüngda sorkar school lakh 11.07 aliba nungi lakh 10.13 dang kumogo aser sorkari yariba school 83,000 aliba nungi tangbo 79,000 dang kumogo.

Ajisüaka 2014 kum nungi 2024 kum tsüngda private school tembo kanga renlokogo; private school lakh 2.88 aliba nungi tangbo lakh 3.39 kumogo.

"Tesüiba kum 10 tsüngda school nung tanurtemji crore 26 shi liasü saka 2024-25 kum nungbo school tanurtem kanga ajema kumogo. Tanurtem ajema akumbaji tesem melenshiba, tanur asoba 'rate' kanga ajema akumba, sorkar school tem ka küma loktepba aser tayongzükba balala ajanga lir," ta report nung shia lir.

Sorkar school kar nung tanur ajema lira anasa aliba school kar den loktepba dang 'School consolidation' ta ajar. Centre sorkar aser NITI Aayog-i state

tem dang tanur ajema aliba school tem dang anasa aliba school den lokteptsü ajungshia arur.

Right To Education Forum coordinator, Mitra Ranjan-i, iba amaji school tem loktepba ajanga sorkar school tem ajema akümer, ta metetdaksü.

Paisa, "School tanurtem aikati pei kiyong nung aliba school shibangadokra school züngtur anenadoker. Ibaji ajanga school tanurtem ajema akümer," ta ashi.

NITI Aayog report ajanga ashiba agi, school züngtur anenadokertemji teimbaka secondary level, Class IX aser Class X nung azüngertem lir.

2014-2024 kum tsüngda primary level nung school züngtur anenba shilembo 0.3 dang lir, ajisüaka upper primary stage nungbo school züngtur anenertemji shilem 3.5 liasü.

Ano secondary level nungbo school züngtur anenertemji shilem 11.5 liasü.

2014-15 kum upper primary nungi secondary tashi nung 'pass' asürtem shilem 91.58 aliba nungi 2024-25 kum nungbo shilem 86.6 dang akum.

Transition rate teimbaji Puducherry aser Kerala (shilem 99.6) na nung liasü. Meghalaya nung transition rate 65% liasü, Bihar nung 66.7%, Mizoram nung 77.8%, Madhya Pradesh nung 77.8%, Uttar Pradesh nung 78.1%, Jharkhand nung 81.3%, Arunachal Pradesh nung 83.3% aser Nagaland nung 83.8% liasü.

India aser Netherlands nati tezüngzüktep 17 agiogo

New Delhi, May 18 (Agencies): Ato kilonser Narendra Modi-i anogo ananü Netherlands semdanga iba linük nungji lenirtem den senden amenba sülen India aser Netherlands nati green hydrogen aser defence tsütsü amalitepa inyaksü densema tezüngzüktep 17 agiogo, ta ketdangsertemi metetdaksü.

Modi aser Netherlands Ato kilonser, Rob Jetten nati Ukraine atema jembiba den külemi West Asia tensa atema-a o lemtepa liasü.

Linük anati külem sangdong ka ajanga, "Lenir anapronglai West Asia tensa ajanga region dang masü saka alima tesem ajaklen meimchirtem timtemba aser energy supplies den shishilembaba network mejungi kongshiba tebilemsü lemsatop," ta metetdaksü.

Ato kilonser Modi-i Netherlands semdanga ajanga Netherlands aser India na tsüngda tesendaktep asalentong partnership-i ajungketogo aser Gujarat nung semiconductor fabrication plant nungita yaritsü atema tezüngzüktep ka agi.

Jetten-i taoba mapang kiralongrartemi Jammu & Kashmir kübok Pahalgam amakba aitsü aser India-i kiralongra anema raraba parnoki nungita yaritsü, ta metetdaksü.

"Ato kilonser anapronglai kiralongra tapu ajak aitsüogo. Tenatisa kiralongra khenyongi magizüktettsü atema tayongzükba agütsü," ta sangdong nung shia lir.

Linük anati defence industrial tsütsü taliba amalitepa inyaksü, defence osettem yanglutsü atema lenmang

bushitsü aser technology transfer asütsü atema tezüngzüktep agi.

Tata Electronics (India) aser ASML (Netherlands) nati semiconductor fabrication atema tezüngzüktep ka agi aser India Ministry of Mines o Netherlands' Ministry of Foreign Affairs na tsüngda tongtibang minerals atema tezüngzüktep ka agi.

National Maritime Museum of Amsterdam aser India Ministry of Ports, Shipping & Waterways ministry na tsüngda Lothal nung National Maritime Heritage Complex (NMHC) amenoktsü atema tezüngzüktep ka agi.

Iba dak alia Netherlands-i Aso 13buba mapang nung jandi agi yangluba Chola Dynasty ausotem India nem meyipa agütsütsü nangzükogo.

NEET UG paper leak ken o nung CBI-i coaching centre kibur ka puogo



Shivraj Raghunath Motegaonkar

New Delhi, May 18 (Agencies): NEET UG question paper leak asüba ken o dak sendakba nung CBI-i Shivraj Raghunath Motegaonkar puogo.

Motegaonkar-i Maharashtra kübok Latur yimti nung coaching centre- Renukai Chemistry Classes (RCC) lapoka lir, ta Hombarnü ketdangsertemi metetdaksü.

Amongnü CBI-i bushisüngdanga aoba mapang nung Motegaonkar indang mobile phone nung NEET UG question paper ji angu, aser iba nungji ajemdaker pa apu.

CBI-i, NEET UG paper leak asüba aser prokshiba telok nungji Motegaonkar-a

züngsema lir, ta metetdaksü. NEET exam jakdang Motegaonkar den tangartemi NEET UG Exam question paper aser telangzübatemji ngua liasü aser itemji prokshia liasü.

Iba ken o nung Motegaonkar densema tang tashi nung nisung 10 puogo.

Kasa ken o nung Jaipur, Gurugram, Nasik, Pune aser Ahliyanagar yimitem nungi nisung 9 pua liasü. Nisung 9 nungjagi pongubo court matsüngdangi anir aoba sülen asüngdangyatsü atema police ket nung agütsüogo.

Hokolbarnü apuba nisung anata Pune nung aliba court ka dangi anir aoba sülen Delhi-i anir ogo.



May 17, 2026 nü Gothenberg nung Sweden Ato kilonser Ulf Kristersson-i tayimtsü anendak Ato kilonser, Narendra Modi agizükba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, MAY (MONUPII) 19, 2026

Nagaland nung alirtem khuret –

Manipur nung taoba küm ana tashi kin o kin na tsüngda azü tokshitepa raraa arur , ano tangbo Tsüngrem tenzüker reverened aser pastor taküm samatsüsüa mapayu, marendak aser metsübui inyakbaji alima nungbo iba dakji alema mapa tamajungbabo malitsü südi. Ajisüaka, shirnoki Tsüngrem tenzükerkem taküm samatsüogo, parnok dang Tsüngremi aochiang ta sarasademtsüsübaji asenok tamangertem mapa asütsü. Atangji, lendong ya Manipur nung ataloker saka Manipur nungertemji asen kidanger aser asen kinunger adianutem lir, anungji parnok rongnung tang amai taochi mesayutep kati ka taküm aser kiojen samatsüsü bilema inyakba azü tokshi mapatem ya asenoki odang repranga toktsüra, asenoka nisung mulungjang madenba nübortem amai asütsü aser oda-odabo Manipur nung atalokba lendong yagi asenok daka kongshitsü aser idangjibo asenoka takoksa aser tesama tia tulu ajurutsü. Aji oda, kin aseme kuma aliba Manipur nung, kin asem tsüngdaji kati ka samatsüsü merangba mapa nungjibo parnok rongnung shinga takoker makümtsü. Tang ya Manipur nung aliba Kuki nungertemi Naga nungertem pua bener oa lir aser Naga nungertemi Kuki nung pua bener oa lir aser tetsüngda nung Meitei nungertemi khen khen Naga nung anema aser khen khen Kuki nung anema inyaker, anungji Manipur lima ya tesünep mali tetsübu agi asüngba lima ka kümogo. Iba ama kin o kin na tsükchitepba mapang asenok Nagaland nung alir Naga kintemi Manipur nung aliba Naga kintem meimtsü aser yaritsü nungdaker, ajisüaka Nagaland nung aliba Naga nungertemi Manipur nung aliba Naga nungertem yarisema tangar Kuki aser Meitei nungertem den raratsüba masü saka parnok tsüngda tsükchitepba anendaktsüsübaji asen khuret kuma bilema inyaktsüla. Manipur nung aliba kin asem tsüngda rarar asünungji , parnok rongnung parnoksa yimjung ken o jembia yimjung meyanglutettsü, anungji tezülen aliba tangar telok ka parnok asoshi yimjung yanglutsüsü atema tang ya kanga nungdaker aser iba yimjung yanglutsür telokji Nagaland nung aliba Naga nung kintem ya asütsü. Aji oda, Manipur nung Meitei nung o Kuki nung na aser Kuki nung o Naga nung na azü tokshitepa raratepba ya asenok Nagaland nung alir Naga nungertemi repranga dang metoktsüi tebang iagi yimjung o jembitsüla aser teka amuoka yimjung mapa inyak meshiogo. Atangji, asenok Nagaland nung aliba Naga kintema meputep asütsüa akok saka asenokbo rarabo merarar. Aji oda, Manipur nung dang masü asen nisung Naga nungertem ya Myanmar nung, Arunachal aser Assam nung lir, anungji parnok dak langka tamajung atalokdang, asenok tama ser teyari agi atongtsüla aser shisabolua aser tetsübu mapang temulungjang sünepja yimjung yanglutsürtemji asenok Nagaland nung aliba Naga nungertem asütsüla. Asenoki dang longjemer inyakra, Nagaland nung aliba Naga nungertemi Manipur nung Naga nung o Kuki nung na raratepa aliba anendaktsütettsü aser Meitei nungertem dang Naga nung o Kuki nung na prongla den kasasa putepa alitsü ken o shitettsü. Iba yimjung yangluba mapaji Nagaland nung Naga nungertem rongnung shibai tenzüksü ? Angami nungerbero par Tenydie kintem Mao aser Maram ama Manipur nung lir, anungji Manipur nung lendong atalokba ya parisa shisabolua tebilemba bilema alitsü. Ajisüaka, parnoki Manipur nung aliba kintem den yimjung o bener oa mejembitepba akok. Iba ama mapang nung, Naga nung kintemsa asüyonga yimjung yangluba mapa nungbo Ao kini tama khuret bena Nagaland nung aliba Naga kintem ayongdena Manipur yimjung asoshi ken o süoka jembira, atangji, yangji Tsüngrem adentsü. Manipur ya Yeriko yimti dang nungi tilaba aser tashimaitba, anungji Ao kini Tsüngrem dang nungi tashi meshia Naga nung ajak ayongdener yimjung o agi Manipur amak tenzükra, atangji sarasadema dang Imphal atong nung Manipur jaraji laoadoktsü aser Naga, Kuki aser Meitei nungertemji teraratepa kodanga meraratep amai kümadoktsü. Kobasa Modi aser Amit Shah nati makok, aji Nagaland nung alir Naga nungertemi akoktsü.

OLEMSABANG

AJEMALUBA ASER OCHISHIBA NUNG TEMOATSÜ

~ IMTIKUMLA IMCHEN

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

Khen mapang ka nung kibong ka nung tanur (6) terok liasü, Tetsür asem tebur asem. Tetsürtemji tantsü liasü anungji parnok ajaki tenu teburtemji kanga meima liasü. Kenü tebur rongnung tanubusang shirang. Tetsüi teyi nung dang mozü ali-i aotsü ashi. Idangji tetsür rongnung tantsüla oja asenok sensakerji sen a mali mozüji angati angutsü masüji Tsüngrem dang anepjang ta sarasademdi Obala jaang. Tebu arua amen, idangji tetsüi ashi asenok ajaki tebusang dak nematang aser yamai shidi. Oba Tsüngrem nai onokmadak kanga meimbayong ne tenüng asanger, aser onoki ne dang kechi asoshi mepitsü lir ajak nai meteta kar. Onok ajak ne chir lir aser ne tsüngdang mokremer tanubusang kechi tashidak agi shiranger nai anepjang ta sarasademdi. Tetsüi iba o shili dang parnok ajak nüktzü alua taneptsü meshia sarasadem.


Idangji tanubusang ano küm pungo (5) tain dang liasü. Kodang sarasadem tenzüker tanursangi pa tekolaklen nisung ka nokdaka angu, pai reprang nung ajungbena sama. Sarasadem temer tetsü dang pa kolaklen nokdakbaji shiba ta asüngdang. Tetsüi na aneptsüsang alitsü ta shir tanurja anep. Par kibonga kanga temoatsü ngua ali. Sensaker kibong asünung tanurtem kakat shisatsü bushiba nung tangar memenepi liasü. Saka tsürabur ajemalu, ochishir Tsüngrem akümtsübu aliba taküm asüba agi rongsen aser takaba meliaka kati ka taoba ta bilema pelatepa dang liasü.

Anepdang aonung metitemi kibok tekülem agiba ajanga parnok ajaki Laishiba angateta liasü. Kenü anogo par kibong ajunga temokok agi atem nung tsüketer sarasadema liasü. Idangji kiyonger kari ngua parnok menüja ner bo menden a mali ali nung dang amener nu ta sensaja ashi. Saka parnoki kecha melangzü kakat shisatsü anguba nung medemer memenepaka teti Laishiba azüngba agi Tsüngremi temetetba shisatsü agütsü. Oda lia liabo Tsüngremi yariji par kibong asoshi lenmang ka lapoktsü. Iba osangji yamai liasü. Par yimtak kibong shia nungi tanur ka Sorkar i yaria kakat riju züngdaktsüsü osang ka yimsüsürtemi ayimoktsü. Tatidang agütsür tajungba ka shimtsü asünung yimtak kibong shia nungi tanur ka ka agütsü. Takartem pei chir i takok angutsü ta bilema liasü saka kodang iba mapang tonga aru yimti nung wara tamajung ka agi menepa tanur aika shirang. Takar aser tashir chir tatidang agütsüsü aotsü melen mozüki nung taneptsü bushi meso. Anungji iba tatidang ji tanur aika magütsütet aser ibaji dang masü karbo taküm sama. Kodang tatidang agütsüsü anogo atong kibong shia tanur kati bo sa agütsüsüba ji ozüng süa alinung tebu o tetsü nati meshimejunger süaka yamala tatidangba nungjibo shir i Tsüngrem akümtsübu pai ashiba angadir Kibubai kotak nungi ajizüka yoker ta lirko kecha marendaki oa agüjangma ta tanür dangji ashi. Aji sür tebuti tetsür tanutsüla aser tanubusang tena rongnung ka oar agüjang ta ashi. Idangji tanubusangi ni ang odi lenmang talangkaji na kanga belemtsü ta teyi dang mesüzüka ashi. Tanubusang tatidang agütsüi oar alidang yimertemi tsürabur dang nena chir shibabo kakat shisatsü azüng, yamala jibo tazünger tajungtemi dang akoker. Ner chir amala kati bo majungtsüsa ta shia menütsü. Saka tebuti pei chir dang Tsüngremi kotak nungi ajizüka yoker ta ashiba to bilemtet. Tanubusangi a kasa o ji bilemteta ano tatidang kakat malemdang pa menden nung apudaker sarasadem kechiyong iba amala mapa ajanga takok angubaji ajangshia dang liasü. Pai sarasademba ji tesayur kati angu aser kanga süngmanga pilem tesayurtem dang iba tanur ya shimtetdi kechiyong yamala mapa nung ya Tsüngrem akümtsübur nungdaker. Yamaji parnok jembitepbaji tanubusangi a angashi aser iba ola agi pa mulung nung kongshia tepela tulu agi temulungjang sünger kidangi aru.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

'Rededicate 250' sarasadem sentong nung aikati shilem agi



May 17, 2026 nü Washington, D.C nung aliba National Mall nung 'Rededicate 250' sentong agidang tangokba noksa nung angur.

May 18, 2026: May 17, 2026 nü Washington, D.C. nung aliba National Mall nung nisung meyrjang aika adenshia 'Rededicate 250' sarasadem sentong nung shilem agiogo.

America linük nüchiso anguba sülen küm 250 ajungbamong amongtsü jelia ayongzüka agiba Rededicate 250 sentong nungji Khristantemi tanela asentenshi atema sarasadema den külemi tatok meshi aser America linük atema sarasadema liasü.

Amongnü (May 17) tzunglu aruba den külemi kanga tatsük liasü, ajisiüaka United States aser alima tesem balala nungi America nunger meyrjang aika adenshia iba sentong nung shilem agiogo.

National Mall nung parnoki sarasadem, tekülem ken aten, Lai azüing aser tanela asentenshi milak yokang, ta sarasadema liasü.

'Rededicate 250' sentong ya 'Freedom 250' indang shilem ka liasü.

America nunger nüchiso anguba sülen küm 250 ajungbamong taküm amongtsü.

Rededicate 250 ayongzükertemi, iba sentong ya linük meimba atema benjungtepba sentong ka dang masü saka nüburtem dang Tsüngrem dangi tanaben meyiptsü, tatok meshitsü aser longjema alitsü tayongzüka agütsüba sentong ka lir, ta metetdaksü.

Iba sentong nung US Tir Donald Trump-i jelia 'record' asüba osang metetdakja liasü. Iba sentong nung tatong Tir JD Vance, Secretary of State Marco Rubio, House Speaker Mike Johnson aser Defence Secretary Pete Hegseth nungera aden.

Iba sentong nung adener Khristan lenirtem rongnung sayutsüingir Franklin Graham, pastor Robert Jeffress, sayutsüingir Samuel Rodriguez, actress aser "The Chosen" star Jonathan Roumie, Cardinal Timothy Dolan, Bishop Robert

Barron aser Yihuda nunger shisashir Rabbi Meir Soloveichik nungera liasü.

Osangtajung kentener, Chris Tomlin leniba nung tekülem aser tetushi agia liasü.

Tamalen US army nung alisang, Parish Clinton-i, Rededicate 250 sentong ya kü akümüli nung tongtibangtiba sentong ka liasü, ta ashi.

Paisa, America nungeri Laishiba tesayubatem nungi talangka pilaogo, anungji America nung tanela asentenshi nungdaker, ta ashi.

Kentucky nungi Cindy Herzog-i, iba sentong ya puti otsü nung züngoktsü, aser iba sentong ajanga linük tesem ajaklen tanela asentenshi milak jangrudaktsüsüa akok, ta ashi.

Anogo piyong agiba sentong nung o jembirtemi America nungertem dang Tsüngrem dang nungi taneptsüba meshitsü, shisatsü meshitsü aser asentenshi milak yokang ta mepishitsü tayongzüka agüja liasü.

Uganda nung kinüngertemi Khristan ka teka anaprong lepdoktsü

May 18, 2026: Taoba ita Uganda nung Muslim nunger kinüngertemi Khristan ka teka anaprongla lepdoktsü, ta osang ka ajanga metetdaksü.

Arrshi küm 40, Kalegeya Faruku-i taküm March ita nung Khristan yimsü agizüka liasü.

Pai Khristan yimsü agizükba agi Muslim nunger kinüngertemi pa teka anaprong lepdoktsü.

Osangbener den jembidang Faruku-i, "Taküm March ita tetenzüklen ni Yisu nem kü taküm bendanga agütsü, aser ibaji ajanga kinüngertem kanga mepelai liasü. Parnok kanga jashi aser ni amokmerena liasü," ta metetdaksü.

Faruku-i, "Ni jenshia liasü aser ni tesem melenshia alitsü atema April 17 nü kidangi khu abeni aoba mapang nung ozü adianutemi ni ataa liasü," ta

metetdaksü.

Pa Bugweri District kübok Busembatia jilai oa pa den Khrista osangtajung lemsatepsang par medemer Khristan ka den külemi alitsü tebilemba liasü.

"Ni ki atongba mapang nung adianutemi ni ataa liasü. Parnoki ni longbang aser ki telungi anir atuba sülen teka anaprong lepdoktsü. Tesülen kinüngertemi ni arem kati anir oa lenjem ka anasa toktsü," ta pai metetdaksü.

Paisa, "Ainer kati ni ngua kümzüka atema ni Tsüngrem dang pelar. Pai osang sangdongba sülen nisung aika arua ni anasa aliba clinic kati anir ao," ta pai metetdaksü.

Iba district nung aliba evangelical Arogo ka nung assistant pastor kati, Faruku-i ozü Arogo nung tekülem

sentongtem nung dena aruogo, ta metetdaksü.

Faruku tebu, Lubega Issa-i, "Allah indang yimsü toktsürtem dang yamaji inyakang ta sharia [Islamic özüng] ajanga onok dang tuyur," ta ashi.

Khristan lenirtemi iba tatalokba ya jungjunga bushisüngdangtsüla, ta takhangba agütsüogo.

Uganda linük temzüng ajanga yimsü temeden agütsüba dang masü saka tangar den pei yimsü lemsateptsü aser tangar ka yimsü meyipdaksütsü atema temeden agüja lir, ajisiüaka Muslim nütsüing teimba aliba tesemtem nungbo mapang shia Khristanatem anema inyaker.

Uganda nung nütsüing shilem 12 dang Muslim nungertem lir, ajisiüaka anüdoklen tsütsübo Muslim nunger nütsüing aika lir.

ANOGO ABEN TSÜNGREM DEN

Taginüba


"Sentilong dang nungi la sentiba : Nai aginüba osettem kecha dena laji medemdangtsü makok".
A. Shin 3:15.

Kodang ni school nung liasü, ni tain ama kümnü saka tangbo ni tanur kümer. Ni azüki ka nung mapang, ki tajung tulu ka nung linüa bilem. Tang ni ki tulu nung alir saka iba ki merüktsü asoshi olura. Ken mapang ka ni temang ulua kümnüa bilem, saka tila akümtsü asoshi 'fitness programme' balala agir. Ni jangratemtsü lokti tapu balala nung atentsü asoshi jangra, saka tanü item maongka aika dang mah ta ashir.

Osang tajung kaji Tsüngremi na kechi tia nung lir ibaji dang aginür. Tain mesüra tanur akümtsü menungdaker, tulu-tila, ki tajung-tamajung Pa asoshi kecha menungdaker. Tsüngremi asenok dak temolung agütsüba ajak agi asen telunglen molungsentsü aser Pa den tesendaktep dang nungdaker.

Asenokia iba nung temolung agüja lir ma ? Asenok taginüba balala alitsü akok, saka shiri anogoshia pei taküm nung mezüngbuba taginübaji Tsüngrem den tesendaktep tajung ayutsü asoshi meranger parnok tepelatsü aser shisa taka. Asen taküm nung maongka tasen, Khrista dak amangba lemsateptsü asoshi reprangba Tsüngremi aginür.

Life Outreach International tentetsang, James Robison alima nungi pilaogo



Rev. James Robison & Betty Robison

May 18, 2026: Life Outreach International tentetsang, Rev. James Robison alima nungi pilaogo; pa arrshi küm 82 liasü.

Robison aser pa kinüngtsü Betty nati Christian television program LIFE TODAY ketdangüsa liasü.

Life Outreach International ministry-i sangdong ka ajanga, "Life Outreach International tentetsang, Rev. James Robison alima nungi pilaogo, ta onoki tejashi nung sangdonger," ta metetdaksü.

James Robison-i pa taküm piyong Khrista osangtajung sangdong aser alima tesem balala nung nungdabapurtem nem teimla aser teyari agütsü.

James aser Betty na indang ministry ajanga taküm jenti kongshiogo aser maneni tarutsü putu aika nung taküm jenti kongshitsü, ta ministry-i

metetdaksü.

"Pa alima nungi pilaba atema onoki jashir, ajisiüaka pai taküm piyong Tsüngrem aser nüburtem tenzüka atema onoki benjungteper. Tarutsü itatem aser kümtem nung maneni onoki James-i inyakba mission mapa inyaktsü-sensakertem nem chiyungtsü agütsütsü, tzürartem nem tzü agütsütsü aser tongtibangtsüa yirua aliba alima nem Khrista teimla agütsütsü," ta ministry-isa metetdaksü.

"Onoki Betty, Robison'er kibong aser alima tesem balala nung Life Outreach ministry atema sarasademjang ta mepishir," ta ministry-isa metetdaksü.

Robison-i kaket-a aika züluogo aser alima tesem balala nung yimti 600 dak tali nung sayutsüingio.

AO OSHI ANGAZÜKDAK:

TANÜ ANGAZÜKTSÜBA OJANG



Yata

(v) alu, atsü aser arem nung tachitsü süngolemba bendenba (pluck vegetables)

* Otsüla küna arem nung süngolemba yatalen senzür adok.

Yataonta

(v) aremi chiyongtsü tapu balala bushii oa bendenba (gather vegetables in forest)

* Yimtaklirtembo yataonta len kanga jajar.

OLONG PAITEP # 7508

1		2		3		4
		5	6	7		
8						
		9				
	10					
					11	12
		13		14		
15				16		

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T___lu - (3)
- 10. Takdang temalen - (9)
- 11. Tesa___a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüingsak-mopung - (5)

LANGTSÜNGLEN

- 1. Reprangdaksü - (4)
- 2. ___ur - (3)
- 4. Kiojen yangludak - (6)
- 6. _____ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüing tajemtdak - (6)
- 12. ___adenshi - (4)
- 14. Tsünüsenbongtsü adokdak - (3)

OLONG PAITEP # 7507 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

NAI-A YA METETTER



Alima nung tebur temang ka nung Marvel comic book characters teimtiba tattoo süa alisangji arishi küm 40 tain Tom Radford lir. Guinness World Record-i December 13, 2025 nü Tom Radford temang nung Marvel comic book characters 63 aliba kuli süogo. Radford tanur asüdang nungi Marvel kanga sapur aser iba jagi pai temang nung iba indang tattoo enoktsü tenzüka liasü.

Jun 5 nungi tourists asoshi Manas National Park shibanger



Guwahati, May 18, 2026

(Agencies): Tanga tetuyuba ka magütsü tashi June 5, 2026 nungi tourists asoshi Manas National Park shibangtsü ta ktdangsurtemi metetdaksüogo.

Iba mapang Manas National Park nung jeep safaris, elephant safaris aser boating dena tourism activities ajak shibanga atatsü ta ktdangsurtemi May 16 nü ashi.

Iba tetuyuba ya Chief Conservator of Forests aser

Manas Tiger Reserve Field Director C. Ramesh-i agütsü.

Tzüngluruwa mongpu nung conservation measures inyakba nung iba ya shilem ka lir. Arem shiruru meinprongba ajemtsü aser parnok senzüba nung yaritsü asoshi protected forest areas telung nung tourist movement noktanger ta Forest ktdangsurtemi ashi.

Tan tourism season nung tourist aika aruogo aser foreign tourists 16,00 shi dena 60,000

visitors liasü ta ktdangsurtemisa ashi.

Tan season nung Manas Tiger Reserve nung Rs 1.5 crore shi revenue ngutetogo ta parnokisa shisem.

Manas National Park ya Assam nung UNESCO World Heritage Site ka lir. Manas National Park ya India nung wildlife habitats nung tongtipang ka aser Northeast nung major ecotourism destination ka ama züngshir.

Tripura sorkar pre-primary schools nung tazünger teimba akümer

Agartala, May 18, 2026

(Agencies): Tripura nung tan academic year nung government pre-primary schools nung azünger teimba kümogo ta Education Department-i metetdaksüogo.

West Tripura district nung Directorate of Elementary Education ajanga anogo pungunü teacher training workshop ayonga agidang iba osang metetdaksü aser yaküm dang nungi taküm kaketshir 24% agi teimba kümogo ta ashi.

2026-27 academic session nungi pre-primary schools tasen 94 lapokba nungi tesayur 100 tashi iba workshop nung aden.

"National Education Policy (NEP) 2020 kübok pre-primary education ya compulsory kümdaksüogo aser arishi küm 3 nungi 6 tsüingda tanurtem angazüktsüba ya kanga tongtipang lir" ta Education Secretary Dr Milind Dharmarao Ramteke-i ashi.

Arishi küm trok nungi brain development tenzüker aser iba

mapang nung tanur ka tarutsü tamendakdak yanglur ta pai ashi.

Tanurtemi temulung alemtsü aser tamang akatsüsa tesayurtemi inyaksüla kechiyong tarutsü putu yangerba nung tesayurtemi tongti shilem agir ta Dr. Ramteke-isa ashi.

Education Department ajanga mapa balala inyakba nung takok angutsübaji tesayurtem dak dang keta lir ta paisa shisem.

**GOVERNMENT OF NAGALAND
OFFICE OF THE LABOUR COMMISSIONER
NAGALAND: KOHIMA
New Capital Complex**

No. LBR-8/1/2021-22 //

Dated Kohima, the thMay, 2026.

NOTICE INVITING EXPRESSION OF INTEREST

The Labour Department, Government of Nagaland, invites sealed Expressions of Interest (EOI) from eligible firms, agencies, organizations for imparting training on the Labour Codes and the Child Labour (Prohibition and Regulation) Act. The training programme aims to enhance awareness, strengthen compliance, and build the capacity of stakeholders across the districts of Nagaland.

The detailed EOI document containing the objectives, scope of work, eligibility criteria, terms and conditions, and submission requirements may be downloaded from the official website: <https://labour.nagaland.gov.in>.

Last date of submission of EOI is fifteen (15) days upto 1400 hours from the date of publication. Sealed envelope titled "LABOUR CODE" and addressed to Labour Commissioner containing EOI and non-refundable fee of Rs.5000.00 by way of Pay Order/DD in favor of Labour Department, payable at Kohima, Nagaland may be submitted to the Office of the Labour Commissioner, New Secretariate Complex, Kohima. Inquiries if any may be obtained from Office or through E-mail: <labcomm-ngl@gov.in>.

(AVILE VITSO)
Labour Commissioner
Nagaland, Kohima.

Totzü jenjang ajungketba atema Kenya nung longkak ait



Nairobi, Monupii/May 18 (Agencies): Iran rara ajanga totzü nung jenjang ajungkettsüsa akümba sülen Hombarnü Kenya kübok jila balala nung nüburtemi longkak aita liasü. Kasa mapang nung linük ajunga nung public transport strike ka ayongzükbä sülen nüburtemi aika mapai tetsüing agi jaja aotsüsa aküm. Totsü nung jenjang ajungketba anema Transport Sector Alliance-i Deobarnü sangdong ka ajanga parnok kübok aliba association temi ayaterem nungi inyaksangshi anentsü ta ashi. Kasa mapang nung police-i, minprong ajak aziöktsü atema parnok jenjang agitsü ta ashi. Kenya indang Energy and Petroleum Regulatory Kenya kübok tzüküm nung

Authority-i taoba hopta totzü shilem 23.5 ajungteka liasü. Parnoki taoba ita-a totzü shilem 24.2 agi ajungketer liasü. Middle East nung mepetmesü adoker aliba ajanga alima ajunga nung totzü aser gas supply nung tetsükdaktsü adoker aliba mapang iba jenjang ya agiogo. Hombar anepdang linük yimyiba Nairobi nung transport operator temi lenmangtem nokdanga ayu aser tesem balala nung nüburtemi longkak aita liasü. Longkak aiterem senshidaktsü atema longkak aiterem dak tear gas khaloktsü aser longkak aiteremia tyre tem rongga lenmang tongtibangtem nokdanga yua liasü.

aliba yimti tongtibangtiba Mombasa nung longkak aitba ajanga supply-chain nung tetsükdaktsü adoktsü ta tsübua bilemer. Finance Minister John Mbadi-i Citizen TV station dang ashiba agi, finance ministry aser energy ministry nati ken o bentettsü atema Hombarnü nikongtsütsü public transport operator tem den ajuruteptsü imlar. Kenya-i totzü product ajak amai Middle East nungi sorkar o sorkar na tangatetep nung bener arur. Totzü jenjang ajungketba ajanga gari nung senzüsenpongba taah timba kümogo aser osettsüt nunga jenjang tali kümogo, aser iba ajanga kibongtem timtema arudar.

PASTOR KA NÜNGDAKER

Bangalore Ao Baptist Fellowship (BABF) nung tenzüksü asoshi Tajaba tejangja akaba aser Tanela agi sünga aliba Sannüker ka nüngdaker. Tazüngba nung BD/ M.Div aser iba dang temaba azüngba ATA/ Serampore Institution nungi asütsüla, Arogo nung toklanga tenzükbä küm ishiba agi pongubosa (5) inyakba nebu asütsüla, aser arishi küm 40 - 55, Ao aser English oshi nung tetemsü, kibong kümer alir, Bangalore Ao Baptist Fellowship aser ABAM inyakyim kübok tenzüksü nangzüktetba Tsüngrem tenzüker.

Tejangratemi June 30, 2026 tashi nung iba tenzükbä mapa asoshi tejangjaba nung agüja aliba email nung tongteprateptsü akok.

Email : ababbangalore@gmail.com

AO RIJU SANGDONG

Ao Riju-i Achaayanga Agiba Arangtet Tatidang Rongchii 28-30, 2026 Takok Angurtem Yamai Sangdonger:

- ACT 301-302 : Tatidang agütsür : 1 Takok angur : 1
1st Division : Roll No. 1
- ACT 401-402 : Tatidang agütsür : 1 Takok angur : 1
2nd Division : Roll No. 1
- ADT 101-103 : Tatidang agütsür : 1 Takok angur : 1
1st Division : Roll No. 1
- ADT 201-203 : Tatidang agütsür : 3 Takok angur : 1
1st Division : Roll No. 1***
- ADT 301-303 : Tatidang agütsür : 1 Takok angur : 1
1st Division : Roll No. 1, 2, 3 & 4
- PGDT 601-603 : Tatidang agütsür:7 Takok angur:7
1st Division: Roll No. 2, 3, 4*, 6, 7, 8 & 9*

Temetettsü:

1. PGDT 701-703 nung tatidang agütsür alir item Roll No.temiba takoker osang sangdongba anogo nungi ita ka tsüngda tashi nung Dissertation onük (Soft copy nung) office tongtsütsüla. Roll No. 1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43, 44, 45, 46, 47, 48, 50, 51, 52 & 54
2. Roll No. sülen * aliba tetezü marks 80 sür tema anguba tamaitü alitsü.
3. Takok ngua alirtem atema Marksheets Aami 1, 2026 anogo office nungi angutsü.

Sd/-
Rev. Prof. Rongsen Lkr
Chairman

Sd/-
(S. Wati Ozüküm)
Secretary

Pakistan-i US nem Iranian proposal tasenba agütsür

Karachi, Monupii/May 18 (Agencies): Yimjung asoshi tetsüingtai ia jembir Pakistan-i United States nem Middle East nung rara tembangtsü asoshi Iran-i proposal yanglushiba agütsüogo, aser mangatetep alibatem angateteptsü mapang kangabo mali, ta Pakistan-i Hombarnü ashi. Iranian Foreign Ministry odongtar Esmaeil Baghaei-ia Tehran tangatetba Pakistan ajanga America nunger nem agütsüogo ta ashi. US aser Israel nati February ita tatemlen tayimtsü amshia Iran maker hopta trok sülen ceasefire ka sangdong, saka Pakistan tetsüingtai ia yimjung ken o jembiba anendaka lir, aser US Tir Donald Trump-ia ceasefire ya "life support" nung lir ta shia lir. Pakistan-i proposal tasenba

indang osang tejangja magütsü. Mangatetep tawa shibangtsü mapang agitsü asü ta asüngdang dang, linük anaprongi goalposts maneni melenshir ta langzü aser mapang mali, ta ashi. Washington-i Tehran dang nuclear sentongtem raksatsü aser Strait of Hormuz shibanga aliba lapoktsü ajungshir, koba ajanga alima nung totzü aser liquefied natural gas shilem 20 shi abener. Iran-i rara nung teraksa asoshi compensation meshir, US-i Iran nunger rongnendak tesemtem mokdanga aliba tembangtsü aser tesem ajungalen rara anentsü ashir. Hopta tatemlen Truth Social nung Trump-i, Iran asoshi anütetsü jajatar aser parnok ilongtsü nüngdaker, mesüra parnok kecha malitsü, ta shia liasü.

Iran nung mitkar inyaksangshi tanaben tenzüksü atema jembishinütsü Trump-i national security advisers tem den Mongulbarnü ajuruteptsü imlar, ta Axios ajanga ashi. Jembishinü nung tangatetep kati maruba nung Iran indang nuclear mangdang tem dena lir. US aser tashi tulu aliba linük temi Iran nem nuclear nok-nü meyangludaktsüner. Tehran-i yamaji inyaktsü memeranger ta ashir, rara atema compensation aginer, aser tarutsü nung mamaktsü guarantee aginer aser Iran nunger totzü tanaben yokdaktsütsü temelaba aginer. Baghaei-i tensa ajak atema Tehran renema lir ta ashi. Aibelen tilatiba nunga tapet telangzüba agütsütsü atema onok renema lir, ta pai osangbener senden ka nung ashi.

Mali nung kiyimba benjung ka nung nisung 10 tepset



Bamako, Monupii/May 18 (Agencies): Mali kübok San tesem nung kiyimba benjung ka atema renema aliba mapang Mali army-i drone amshi civilian 10 tepseta liasü. Taoba ita al-Qaeda den sendaka aliba Nusrat al-Islam wal-Muslimin (JNIM) aser Tuareg atema nüjiso bushiba telok Azawad Liberation Front (FLA) puri military sorkar tamendakdak balala maka security dak sendakba nung mepetmesü adoker aliba mapang Deobarnü iba lendong ya atalokogo. Drone agi amakba Tene tesem nung alir kati AFP news agency dang ashiba agi, "onok tanur 10 tepsetogo. Yimtsüing nung iba anogo ya pelateptsüba anogo ka liasü, saka mangyimba anogo ka kümogo." "Yimtsüing nung alirtem sobaliba nung aliba ama lokti kiyimba sentong ka asoshi renema aliba mapang iba lendong atalok," ta security source kati ashi. Motorbike aika anidaktepa oya aliba mapang drone yagi amak, ta paisa shisem. Local ketdangstür katia AFP dang nisung 10 shi tepsetba

jangjatsüogo. "Kiyimba benjung ka agitsü lia drone agi civilian 10 tepseta liasü. Yimtsüing nung tang mangyimba mapang lir," ta pai AFP dang ashi. JNIM aser FLA la April ita longjemba sülen Mali nung tang tensa kanga mejungi kümer lir. April 25 aser 26 nü tongtibang jila balala amak aser iba mapang linük defence minister tepseta liasü. Kidal aser iba temeket nung jila aser yimtsüingtem FLA aser JNIM nati aziüoka lir, shirnoki linük yimtiba Bamako nem tenokdangba ka agütsür lir. May 7 nüa al-Qaeda den sendaktepa aliba züngsemtemi tesem balala amakba sülen central Mali nung nisung 30 tepsetogo. Item telungpurtem yagi Mopti tesem kübok Korikori aser Gomossogou yimtsüing maka liasü. Mali ya 2012 küm nungi kanga mesüngjemteti arudar. FLA aser JNIM nati rongmesoba sülen security jenjang tamajungba küma odar aser kasa mapang nung Russia sorkari aziüokba paramilitary telok Africa Corps-i parnok ya aziüoktsü meranga arudar.



Manila, May 18 : Philippines kübok Pasay City nung aliba Senate nung impeachment court ama May 18, 2026 nü Senators temi tenangzükbä agiba noksa nung angur. Vice President Sara Duterte anema ken o benoka aliba jembitsü asoshi Hombarnü Philippine Senate ya impeachment court ama adenshia liasü. Iba senden nung senator 23 aden.

Nagaland Taekwondo team-i medal 33 angu



Dimapur, Monupii/May 18 (TYO): 2buba Meghalaya Open Taekwondo Championship nung Nagaland Taekwondo Association-i kanga junga shilem agia medal 33; gold 13, silver 12 aser bronze medal 8 nguogo. Iba asayamung ya Laban Sports Club, Shillong nung May 15 nungi 17 tashi asaya liasü.

Sports Academy Kohima, Chumoukedima District Taekwondo Association (CDTA), Kohima District Taekwondo Association (KDTA) aser Wokha District Taekwondo Association (WDTA) nungi asayartem densema Nagaland contingent nung züngsem 38-i iba asayamung nung shilem agiogo.

Team ya caoch Visabiu Peseyie aser Santsuthung Ngunllie aser Team Manager

Ram Bahadur aser NTA official ama T. Alem Aier nungeri asayartem miner oa liasü.

Nagaland team nung gold medal angurtem rongnung Kumchun Kikon (Under-18 kg), Shiusuthong (Under-38 kg), Mahei Nren (Under-23 kg), Shiuthong (Under-35 kg), Sudeh Lamliu (Under-33 kg), Huthuka Dennis Kinimi (Under-37 kg), Humuyo Chizo (Under-57 kg), Khunou P. (Under-61 kg), Pauziehube Herie (Under-45 kg), Wonchibemo R. Ngunllie (Under-45 kg), S. Bovito Chophy (Under-63 kg), Vilabizo Nagi (Under-73 kg) aser Veisalu Dozo (Under-62 kg) nunger densema liasü.

Silver medal angurtemji Samzailungbe Hega, Keyichangbe Hega, KeyizieteibeZelui, Kumkiu,

Senthano L. Tungoe, Nzangbeni C. Kikon, Avungi N. Ngunllie, Thungben Lotha, Randanbemo Z. Kikon, Andrew N. Lotha, Kezevino Seyie aser Sonpari Kumari nunger liasü.

Maneni Chumchanbeni L. Tungoe, Vanya Leah Kinghen, Lichibeni R. Lotha, Ajanthung A. Ezung, Senjumbeni Y. Kithan, Anguvika Jimomi, Elizabeth Ezung aser Menuovilie nungeri bronze medal angu.

Team-i takok tajung anguba nung bendenloka coach Visabiu Peseyie nem iba asayamung indang Best Coach Award agütsü.

NTA-i, Director of the Department of Youth Resources and Sports aser KDTA, CDTA aser WDTA tir tem dang parnok teyari asoshi kanga pelaba lemsatepogo.

Inter-School Zone-2 Pre-Subroto asayamung ayonger

Dimapur, Monupii/May 18 (TYO): Department of Youth Resources and Sports aser Chumoukedima District Football Association na longjemer Under-17 tebur aser tetsür atema Inter-School Zone-2 Pre-Subroto International Football Tournament 2026 ayongzükerü.

Iba asayamung ya Chumoukedima, Dimapur, Nuiland aser Peren district tem atema asütsü.

Asayamung ya May 27 nungi 30 tashi Chumoukedima Football Stadium nung asayatsü. Asayamung nung shilem agütsü jangraba school tem dang May 20 nü tashi nungbo iba

asayamung nung shilem agütsü atema osang agütsütsü mepeshia metetdaksüogo.

Osang tejangjaba agütsü atema item number; 7005719854/7085483878 nung tongteprateptetsü, ta District Youth Resources & Sports Officer Chumoukedima, Nagaland-i metetdaksü.

Atletico atema tatemangbuba asaya sülen Griezmann-i tatok meshi



Antoine Griezmann

Monupii/May 18, 2026 (Agencies): France nunger forward Antoine Griezmann Deobarnü tatemangsa Atletico Madrid nungi asayaogo. Pa Atletico nungi anabenren asayaba sülen tang iba club toktsür.

Metropolitano Stadium nung fan tem sünga adenshir aliba mapang Griezmann-i, 2019 kum Atletico toktsür Barcelona nung oa adenba atema maneni tatok meshia liasü.

"Nenok aikati kü nem tatok agütsüogo ta ni meteta lir, saka ano karibo tatok magütsü lir anungji ni tanaben tatok meshir," ta Girona goal 1-0 agi akokba sülen Griezmann-i parnok pusemertem dang ashi.

"Ni idaki asayatsü koda jangra ademer aji yimdangi marui liasü. Ni lanur ka dang liasü aser ni aibelenogo," ta paisa shisem.

Arishi kum 35 tain asayar ya season tembangba sülen Orlando City SC nung oa adentsü. Pa Atletico nungi anabenren asayaba mapang kum ter shi asayaogo.

Griezmann ya 2014 kum Real Sociedad nungi Atletico nung winger ka ama aden, saka pa Diego Simeone kubok pa ya Europe nung ajaki tsübuba forward rongnung ka aküm.

Asaya 500 dak tema nung asayaba sülen pa ya Atletico

nungi goal timtiba idaktsüba asayar ama club toktsür. Pai goal 212 idaktsür lir.

Asaya nung goal ka idaktsüba ya Griezmann-i Ademola Lookman nem ball agüja idaktsüba liasü. Pa nem club pusemertem aser club nung taoba mapang asayartemi standing ovation ka agüja liasü. Taoba mapang Atletico nungi asayar Fernando Torres aser Diego Godin nata club tir Enrique Cerezo aser Griezmann'er kibong den külemi benjungtepa liasü.

"Tanü ya Antoine indang anogo lir. Pa ya asenok tenük agi anguba asayar tajungtiba rongnung ka lir," ta Torres-i ashi.

Simeone, shibai Griezmann aniteta liasü paia, "na wing asaya-a aru saka onoki teyong nung asayadaksü, aser na goal idaktsütsü atema kanga jangra aküm," ta ashi.

India team Test asaya ana atema August ita Sri Lanka-i aotsü

Monupii/May 18, 2026 (Agencies): India tebur cricket team Test asaya ana atema August ita tatemlen Sri Lanka-i aotsü. Iba asayamung ya ICC World Test Championship (WTC) cycle nung shilem ka asütsü, ta Cricbuzz sangdong ka ajanga Hombarnü metetdaksü.

Iba asayamung asayatsüba anogo tejangja tang tashi atazüka mali, saka Sri Lanka Cricket nung source kari ashiba agi, asaya ya August 15 aser 27 tsüngda asayatsü imlar, ta Cricbuzz-isa metetdaksü.

Iba asayamung nung T20 Internationals-a asem asayatsü imla liasü, saka iba dak sendakba nung osang tejangja mali.

Test ana ya Lanka Premier League tembangba sülen asayatsü, koba August 9 nü atemtsü. Iba asayamung atema India team densema stakeholder ajak nem osang agütsüogo.

ICC delegation nung shilem ka ama BCCI secretary Devajit Saikia-i, Sri Lanka Cricket nung tang mepetmesü adoker aliba


lepareprangshitsü atema ogo. Tir Anura Kumara Dissanayake-i anir sorkari tawa Sri Lanka Cricket ya loksaja liasü. Sri Lanka Cricket Transformation Committee ta nüngja agütsür interim body ka tentettsür lir.

India team June ita nungi international cricket asaya tenzükshitsü. June 6 nü parnok Afghanistan national cricket team den Mullanpur nung asayatsü aser iba sülen ODI asem asayatsü. Iba sülen India team Ireland, England aser Zimbabwe nung oa asayatsü.

World Test Championship (WTC) nung India team tang pongububa nung lir. Parnoki asaya teku nung asaya pezü kokogo aser pezü nung tamakok nguogo. Parnoki point 52 ngua lir aser points percentage 48.15 lir.

2025-2027 WTC cycle nung asaya ana dang asayar liaka World Test Championship (WTC) nung Sri Lanka team pezübuba nung lir.

Sinner-i Italian Open koka alizüng tasen ka tongtetogo



Jannik Sinner

junga asaya-a pai Paris, Indian Wells, Miami, Monte-Carlo, Madrid aser tang Rome nung Masters title benogo. Item asayamung ajak koka asayaba mapang Italy nunger asayar ya set ka nung danga tamakok mongui liasü.

World No.1 asayar yagi otsüsütsüsa Masters 1000 level nung asaya 34buba khen danga tamakok mongui asaya arudar. Pai Masters 1000 level nung tatemsa taoba kum October ita Shanghai nung Tallon Griekspoor mekoki liasü.

Sinner-i taoba mapang Monte-Carlo, Madrid mesüra Rome nung asayamungtem khen danga koker maliasü. Ajisüaka pai kum ka nung asayamung asemprongla koka Rafael Nadal den kasa kumogo, shiba 2010 kum asayamung asemprongla ya koka season ka nung clay nung asayaba Masters asayamung ajak koka liasü.

Djokovic-i Career Golden Masters ya arishi kum 31 asüba mapang kokteta liasü. Ajisüaka Italy nunger asayar yagi kum tenet jelia iba alizüng tongtetogo aser pai tang tashi nung Masters 1000 title 10 bo bener lir. Ajisüaka Serbia nunger asayar yagi Masters asayamung 40 koka otsü tasen yanglur lir aser pai kijai Golden Masters ya anaben koktetogo.

Monupii/May 18, 2026 (Agencies): Teburtem rongnung World No. 1 asayar Jannik Sinner-i alizüng tasen ka tongtetogo. Iba alizüng ya pa masüdag asayar kati dang tongteter lir.

Deobarnü Rome nung Italian Open final nung Casper Ruud akokba sülen Sinner-i pa indang career nung ATP Masters 1000 titles teku prongla koka Career Golden Masters koktetogo.

Novak Djokovic kijai ATP Masters 1000 titles teku prongla koker liasü.

Kasa mapang nung Adriano Panatta-i 1976 kum Italy Open akokba sülen Jannik ya Italy nunger tebur asayartem rongnung iba asayamung akokba mezüngbuba asayar kumogo. Panatta sülen kum 50 lir pai iba asayamung kokogo.

Taoba ita trok tsüngda Sinner-i ATP tour nung kanga

BILEMDANGANG

"Anogoshi langka tasen angazüktsü merangang."